

江夏縣志卷之

武昌府江夏縣知縣陳元京纂修



文苑

立德立功則有行業然立言亦居不朽之一楚自屈
宋為騷壇祖接踵而擅名者若晉之孟嘉孟陋梁之
費昶唐之李善甚卓卓者也自明以制士

國朝因之詩古文詞向特以試翰林考宏博我

皇上丁丑會試於時文經論策外增五言排律一首鄉試
及提學歲科試合生童皆一例焉江邑舊志各代迄

江夏縣志

卷之十

文苑

一

本朝列文苑者固不乏其選而後之蒙

菁莪新化者步武前人何難推著作之才也哉作文苑志

晉

孟嘉字萬年司空宗曾孫少知名太尉庾亮領江州辟

為從事亮嘗大會賓客豫章太守褚裒問嘉安在亮令

自覓裒歷觀得嘉益器之後為桓溫參軍九日晏龍山

叅佐畢集風吹帽落嘉不覺溫命孫盛為文嘲之嘉請

筆作荅文詞超卓四座嗟歎後遷長史

通志作江夏鄖縣人

孟陋字少孤嘉之弟清操絕倫以文籍自娛喪母毀瘠

不飲酒食肉十餘年親族謂之曰毀性無嗣更爲不孝
然後從吉簡文帝輔政命爲參軍稱疾不起桓温親往
造焉或謂曰陋學爲儒宗宜引在府温嘆曰會稽王尙
不能屈非敢擬議也陋博學長於三禮註論語行於世
李充字宏度汝南太守通之孫善楷書王導辟爲丞相
府掾轉記室參軍初好刑名學見晉尙虛談深痛抑之
嘗著學箴宗本仁義雖是非不能無謬於聖人然與慕
元虛而爲倡披者用心自別後征北將軍褚裒引爲參
軍充以家貧苦求外補乃除剡縣令尋爲著作郎時典

籍散亂充分作四部秘閣以爲永制累遷中書侍郎卒
於官所著有周易尙書註釋莊論詩賦表頌二百四十
篇子顯亦有文義郡舉孝廉

梁

費昶善爲樂府又作鼓吹曲武帝重之嘆曰才意新拔
有足嘉異昔郎惲博物卞蘭巧辭束帛之賜實爲勸善
可賜絹十匹南史稱爲閭里才子

隋

黃鳳麟大業中舉進士累遷侍郎史比部員外有文集

十卷

唐

李善字次孫有雅行少嘗受文選於同郡曹憲淹貫古今而不能爲辭時人謂之書簏後爲左侍中進崇賢館學士轉蘭臺郎坐事流嶺外會赦還寓居汴鄭之間以講文選爲業年老疾卒所著文選六十卷行於時

明

盧文政幼嗜學溫雅有度洪武己卯舉於鄉授吏部主事累官太僕丞致仕年八十手不釋卷著太平一覽

江夏縣志

卷之十

文苑

三

劉淵字伯廣天姿俊逸字法趙松雪詩效薩天錫宣德九年以經明行修舉宣宗御批卷曰文理通暢宜授敎職遂授嵩明學訓改安陸江夏歷京山敎諭修舉學政文人多出其門

劉績字用熙宏治庚戌進士幼穎警不羈博洽經史凡所撰述古雅冲淡負一時物望與李獻吉齊名稱友善歷吏部員外出知鎮江府所著有禮記正訓太元註蘆泉詩文集若干卷以才名櫻忌晚年避迹於岳陽

任家相字白甫爲諸生時與郭美命樹幟文壇時人稱

徒隸曰劉先生門無襍賓勿以僕御溷高士之廬也崇禎壬午以曲臺魁京闈甲申歸隱築室餘荷塘著有添學草桐柏軒等集

胡昌任字任可幼穎悟能屬文卒爲郡庠名諸生著有詩文以孫潤官翰林侍講贈如其官

龐載字厚伯順治戊子鄉副謁選除汾陽令靜以安人多以拙目之歸田益落拓有乞字畫者必盡醉詩老更入微自號休亭云

胡從化字內寧弱冠補郡庠腹笥淵博楚藩慕其賢請

爲世孫師甚敬憚焉終困場屋乃益肆力於左國秦漢及唐宋諸大家又復泛洞庭陟衡嶽歸而文益加奇康熙己酉子鳴皋舉於鄉庚戌成進士化始棄去諸生講性命之學會中丞張大修廟學屬化主其役廟學成化復念邑先賢如吳裕中賀逢聖祭祀之典未舉條諸當事爲一一置主入祠及鳴皋令青縣扳輿來迎化勉以冰蘖政聲大起年七十五書卷不去手所著有德園合稿藏於家兩舉鄉飲大賓

梅逢甲字郢青幼穎異能文章補弟子員崇禎己卯副

榜第一癸未獻賊陷城免於難遯跡湘東鄉置田一區
結茅數椽以詩酒自放性孤潔脾睨一世與人飲雖諧
謔歌嘯自如而人不敢犯卒年四十八無嗣生平著述
甚多悉自燬

陳述知字穉彭應城籍自三世祖金官總制賜第江夏
知生而沈篤穎悟過人留心理學言動皆有程式尤長
左史傳記崇禎季以明經授九江司李癸未獻賊屠楚
知父明城戰賊不屈大罵赴水死母姚氏赴水遇救獲
免知聞信掛冠歸求父遺骸不獲遂絕意仕進奉母入

湘東之青山躬親寢膳至老不衰與孝昌丁素石梅城
周穉元相友善順治己亥中丞楊公聘修楚志會海氛
起事寢退刊楚會存書所著有讀史偶見大易偶見四
禮訂疑山居紀異湘東子集藏於家

陳治道字質修博學工文

國初以明經司鐸漢陽造士有方載漢陽府志子三人俱
爲名諸生治道曰吾今旣以詩書遺其子於願足矣遂
解組歸

吳元俊字千人號鹿泉總角補弟子員文名藉甚中丁

酉副車授辰溪教諭年八十卒於官元俊篤內行宅憂
六載泣血廬墓一遵古禮四十斷絃終身不娶邃於掌
故通志邑志多所排纂爲江漢書院長邑人士奉爲楷
模所著喪禮確遵錄叅訂四禮翼北涇語錄學庸邇言
周易貫通解自訟錄河洛圖解香浮堂集相規堂集鹿
泉集相港別業楓香堂手稿十數種藏於家

胡弇字射山明越國武莊公之裔始祖元凱徙家鄂渚
世爲儒籍弇襁褓失怙負性恬逸幼補弟子員食餼郡
庠康熙丙辰歲薦廷試第一著有烟棹草居家錄五經

江夏縣志

卷之十

文苑

七

正韻

任家楫字升公父伯瀾艱於嗣晚年生楫幼聰穎嗜學
通典籍尤熟於春秋爲名諸生數竒不第性樸直不喜
緣飾與人交有不善必面斥之人以是益加敬憚教授
生徒多所造就著有蒼山集

秦如鑄字十臣號京菴少篤學補邑弟子員試輒冠軍
學使蔣允修褒其行優爲諸生範康熙甲子舉鄉試第
三一時稱爲科名中真士年四十八將卒誠其子曰汝
曹無厭貧若枉道以求人求之亦旋得旋失徒喪所守

耳聞者嘉嘆子天洪戊子舉人天注郡庠生天治邑庠生

陳大華字西岳黃岡籍肇昌第五子年十四與諸文士泛舟鸚鵡洲賦詩曰漢祚日以非志士憤不已褊心固其常英氣亦何偉不見大小兒捐生同一理長嘯俯大江日暮酸風起諸文士爲之閣筆年二十二舉康熙庚午鄉試第一傳經史鉤章剔句手自撰錄書法雋逸道麗著有書法緒言凡十卷性至孝遭內外喪哀毀咯血三十二而卒所著石髓詩集乃歿後憑鸞作也

江夏縣志

卷之十

文苑

八

方文啟字梅岩江夏人漢陽諸生爲給諫文瑞從兄端凝和易無崖岸之行好古法帖名畫藏書數千卷多奇文秘籍工吟詠未嘗留草曰詩以適性情寧求後世知耶卒年八十

姚基延字爾康別字液泉九歲能文十歲補邑弟子員食餼試輒冠軍經史子集靡不淹貫早失怙舌耕養母與幼弟同居數十年不析爨以歲貢授江陵司訓巡撫劉殿衡奉文合校八府廣文拔置上等尤留心詩古文詞所著有紀年風雅一家言等集藏於家

程封字伯建號石門順治閒縣學拔貢生任按察司經歷未久告歸性耽煙霞喜吟咏遊歷幾徧山川之勝與王士正阮亭吳偉業梅村杜濬茶村諸人相唱酬著有山雨堂詩集六卷

潘國祚字東柳浙江人隨兄永祚移居江夏以嘉魚籍貢太學詩文各臻其妙有東柳全集藏於家尤工書法驛騎米芾黃庭堅二家孫宗智亦善書然不及國祚神化也

段燦字以融號陶谷由貢生任衡山縣訓導讀書論古

江夏縣志

卷之十

文苑

九

有卓識喜遊覽耽吟詠家居金口鄉謂金口卽古塗口地而志反不載因引陶淵明夜行塗中詩爲據以辨之其以陶谷爲號也蓋卽此意著有陶谷詩文集督學宋邦綏選而敘之其孫追文鏤板以行於世

張文鍼康熙癸酉以麟經魁楚榜兩上春官不第卒於山左旅次子扶棹歸其生平清潔不羣與人語莊而諧博羣書精行楷詩文本晉魏人亦晉魏之間

劉德健字鈍因順治初以明經令南川中喪亂戶口多絕歲賦僅數金未幾解綬歸惟以詩文自娛晚年目

昏忽夢赴召爲某路兵曹遂卒

欽士佃字文思號筠菴本姓周江夏人寄籍黃岡少孤家貧汲水拾薪養母以孝聞康熙癸酉鄉試第一庚辰成進士選翰林庶吉士性恬淡臨事不苟磊落無城府工詩歌古文掌院韓菼推重謂其文爲尹師魯梅聖俞之亞著有瀛洲集代言草時藝行世

危家相字宗臣號瘦桐賀文忠夫人其曾祖姑母也邑庠生立品敦行爲士林所推重庭訓極嚴必務實學次子映奎中甲子鄉試第二甲戌會試第五爲名進士主

江夏縣志

卷之十

文苑

十

郢中蘭臺書院講席及門以科甲隸仕版者甚夥其文稿爲探花楊炳方伯杜官德所敬服旣作弁言復釀金刊刻遠近咸爭購焉又次子映斗弱冠入庠文名噪一時早卒士論惜之孫之醇亦列膠庠爲不墜先緒云

曹覺字予任具異質韶亂早淹博能屬文丰姿綽約暑月衣葛輒傷膚年二十四卽成進士踰年卒士林惜之子鼎元乾隆甲子舉於鄉有文行孫惟熊丙午登賢書曾孫輩有頴鄉薦列膠庠者科甲屢世稱盛茲邑云曾士游字藝若郡庠生係明經克彭之子有文行事繼

母黃氏以孝黃氏生二子士浚士珍父卒黃氏冰操自
矢士游克體母志敬養益篤友愛二弟至於成立娶妻
張氏爲辛酉科孝廉張鴻文長女內助稱賢生子吉暉
甫髫齡而氏卒士游德之義不再娶子吉暉領乾隆庚
子科副車孫翼修慎修俱業儒

田秉元於康熙辛巳年與弟秉鑑同入縣學屢試冠軍
俱食餼廩秉元於壬子科擬元見遺敦品立行教授生
徒成就者甚多有明文端蒙集江鄰詩草遺後

王守正字繩齋賦質靈敏勤於學手錄經史子集工詩

古文詞多奇闢語不拾人牙後慧以廩貢入成均有聲
藝林後歷攝司訓篆實任河陽年四十六早卒時爲惋
惜

江夏縣志卷之十

武昌府江夏縣知縣陳元京纂修

行業

太上立德其次立功則行業要焉大丈夫勵志若高山種德如滄海當乘勢自爲之時本醞蓄以發爲經綸官無大小皆可以表見於斯世卽或名不列縉紳而存有隱德利濟他人佑啟後來如江邑之賀時泰王綏猷汪振繩其可紀者也嗟夫人亦視自所樹立爲可貴耳若碌碌無所短長奚足取焉廉頑立懦作

江夏縣志

卷之十

行業

行業志

漢

黃香字文疆年九歲以孝稱年十二太守劉護聞而名之甚見愛敬香家貧博學通經史能文章京師號曰天下無雙江夏黃童初除郎中元和元年詔詣東觀讀所未嘗見書後告休詔立殿下帝顧諸王曰此所謂天下無雙江夏黃童者也左右改觀尋以言政拜尚書郎數陳得失賞賚倍增上直不離省闕拜左丞累遷尚書令後以爲東郡太守香上疏自陳仍留爲尚書令增秩二

千石賜錢三十萬管樞機東平清河奏妖言卿仲遠等
所連及千人香科別據奏全活甚衆每郡國疑罪輒發
求輕科愛惜人命每存憂濟又曉習邊事均量軍政皆
得事宜帝數加恩賞疾病存問賜醫藥在位多所薦達
延光元年遷魏郡太守郡舊有内外田園常與人分種
收穀數千斛香曰田令商者不農王制仕者不耕伐冰
食祿之人不與百姓爭利乃悉以賦入課令耕種時被
水年饑乃分俸祿及所得賞賜班贍貧者於是豐厚之
家各出義穀助官稟貸荒民獲全後以水潦事免卒於

家所著賦牋奏書令凡五篇

通志作江夏安陸人

黃瓊字世英魏郡太守香之子也初拜議郎遷尚書僕

射永建初大旱瓊上言籍田之禮不宜久廢召見德陽

殿元熹元年遷司空以不附梁冀會地動策免爲太僕

永興元年遷司徒後冀誅拜瓊爲太尉舉奏州郡貪汙

者十餘人尋以五侯擅權引疾退

黃琬字子琛瓊之孫父早喪元和日食詔所問食分數

琬方七歲侍瓊側曰日食之餘如月之初瓊卽以此應

詔及瓊爲司空拜琬爲童子郎辭不就司空盛允有侯

瓊遣候之會江夏土蠻寇事戲曰江夏大邦蠻多士少
琬曰蠻夷猾夏責在司空允甚奇之稍長遷五官中郎
將時陳蕃爲光祿勳深相敬待同心戮力顯用志士而
權富子弟一切峻絕左右遂陷以朋黨蕃坐免官而琬
亦罹禁網幾二十年

太尉楊賜薦之拜議郎

擢青州刺史遷侍中歷太僕出補豫州牧值寇起琬討
平之政績爲天下最徵爲司徒遷太尉轉曰陽泉卿後
董卓秉政琬諫遷都曰大業既定豈宜妄動以虧四海
之望見者畏卓怒之琬曰白公作亂居廬冒刃崔杼弑

江夏縣志

卷之十

行業

三

君晏然不懼吾何憂琬竟坐免後拜光祿大夫及徙西
都轉司隸校尉同司徒王允謀誅卓後卓將李漼郭汜
破長安收琬下獄死

三國

費禕字文偉蜀後主時爲黃門侍郎丞相亮舉爲校尉
使吳孫權滑稽諸葛恪才辨禕應機條荅吳人不能屈
還遷侍中亮北駐漢中請禕爲叅軍後爲司馬值軍師
魏延與長史楊儀相惡禕常入其坐間諫諭分別終亮
之世各盡延儀之用者禕之力也代蔣琬爲尚書令國

方多事公務煩猥禕識悟過人每朝晡聽事日中接納
賓客飲食博奕盡人之歡事亦不廢及董允代禕爲尚
書令欲劾禕所行旬日事多愆滯因嘆曰人才力相懸
若此非吾所能及也延熙七年魏軍次於興勢假禕節
率衆往禦之光祿大夫來敏至求共圍碁時羽檄交馳
人馬擐甲禕與對局色無厭倦敏曰向聊試君耳君信
可人必能辦賊禕至敵果引退封成鄉侯領益州刺史
後進開府爲魏降人郭循所害諡曰敬侯

通志以費文
偉爲江夏

江夏縣志

卷之十

行業

四

李通字文達與郡人陳恭共起兵朗陵殺周直攻破陳
郃生擒黃巾大帥吳霸降其屬建安初舉衆詣曹操拜
振威中郎將屯汝南西界及操與袁紹相拒官渡紹遣
使誘以官爵部曲流涕曰今孤危獨守叵可立待不如
從紹通按劍叱之曰曹公明哲必定天下紹雖強盛任
使無方終爲虜耳吾死不貳遂斬使後又擊破郡賊瞿
恭等定淮汝之地封都亭侯拜汝南太守卒諡剛侯子

基襲爵

通志作江
夏平春人

晉

王偃江夏舊姓江安令值義陽蠻賊張昌橫熾江夏士庶莫不從之惟偃與秀才呂蕤不從昌以三公位徵之偃蕤密將宗室北奔汝南投豫州刺史劉喬鄉人期思令李權常安令吳鳳孝廉吳暢糾合善士得五百餘家追隨偃等不豫妖逆

李重字茂曾少好學有文辭早孤與羣弟居以友愛著弱冠爲始平王文學上疏論九品官人法遷太子舍人轉尚書郎後遷尚書吏部郎務抑華競不通私謁留心隱逸羣才畢舉拔用北海西郭湯瑯琊劉珩燕國霍原

江夏縣志

卷之十

行業

五

馮翊吉謀等爲秘書郎以清尚見稱又疏曰凡山林避寵之才雖違世避時出處殊軌而先王許之者嘉其服膺高誼也宜垂聖恩顯加優命時不能從出爲行討鹵護軍平陽太守正身率下永康初趙王倫辟爲相國左司馬以憂逼成疾卒家貧無以爲殮詔於典客署營喪追贈散騎常侍諡曰成

通志作江夏鍾武人

南齊

李珪之字孔璋爲尚書左丞時申外穀帛至賤珪議出上庫錢五千萬及諸州錢皆令雜買從之後歲荒賴以

賑救

通志作江夏鍾武人

唐

李邕字太和善之子善本江夏人邕僑居揚州江都早負盛名特造李嶠願一見秘書嶠薦之假直秘閣未幾辭去嶠驚問與篇秘帙對辨如響嶠及張廷珪並薦邕拜左拾遺會御史中丞宋璟奏張昌宗有不遜語請付法則天不應邕在階下進曰宋璟志安社稷非爲身謀望陛下可其奏則天色稍解旣出或曰子名位尙卑若不稱旨禍將不測何造次也邕曰不顛不狂其名不彰

江夏縣志

卷之十

行業

六

後術士鄭普思以妖妄爲中宗所信授秘書監邕復抗疏指斥普思詞甚直切明皇卽位拜殿中侍御史改戶部員外郎出爲陳州刺史明皇東封邕於陳州謁見屢獻詞賦稱旨張說忌其才惡之俄而以事下獄罪當死許州人孔璋上書救之曰陳州刺史李邕學成師範文堪經國剛毅忠烈難不苟免往者張易之用權人畏其口而邕折其角韋氏恃勢言出禍應而邕受其鋒是邕有大造於我邦家也疏奏邕減死貶遵化縣尉後從中官楊思勳討賊有功歷括淄滑三州刺史上計京師邕

素有才名後進不識京洛阡陌聚觀以爲古人天寶初
歷汲郡北海太守邕素性豪侈不拘細行李林甫惡其
負才使氣因事矯殺之年七十餘初邕早擅才名雖謫
外中朝衣冠天下寺觀多資金帛往求其文有文集七
十卷其韓公行狀洪州放生池碑批韋巨源謚議文士
推重之後因恩例得贈秘書監祀鄉賢

李鄴字建侯邕從孫舉進士又以書判高等授秘書正
字爲李懷光所辟歷監察御史及懷光叛鄴陷賊中陰與
故相高郢密奏賊軍虛實及攻取之勢事泄懷光嚴兵

召二人詰責鄴詞激氣壯三軍感動懷光不敢殺囚之
及懷光敗入爲吏部員外郎徐州張建封卒兵亂帝以
鄴剛敢拜宣慰使鄴持節抵其軍召將士傳朝旨爲指
陳禍福脫監軍使桎梏使復位凶黨不敢犯還稱旨遷
吏部郎中順宗時歷官刑部尙書兼御史大夫諸道鹽
鐵轉運使憲宗五年出爲淮南節度政嚴事理府廩充
積及王師征淮夷鄴寇李師道表裏相援鄴發楚壽等
州兵二萬餘分壓賊境日費甚廣未嘗請於有司時帝以
兵興國用不足命鹽鐵副使陳昇乘驛諭江淮諸道輸

貨助軍廩素富強卽藉府庫留一歲儲餘盡納於朝廷
諸道效之故王師無乏先是吐突承璀監淮南軍貴寵
甚廩亦以剛嚴相敬憚未嘗相失承璀歸引以爲相十
二年徵拜門下侍郎同平章事廩不喜由宦倖進以疾
固辭竟以太子少傅致仕謚曰簡祀鄉賢廩強直無私
以氣自任當官以峭法操下所至稱理子柱浙東觀察
棫鳳翔節度使

宋

馮京字當世少雋邁不羣舉進士鄉舉禮部廷試皆第

江夏縣志

卷之十

行業

八

一時猶未娶張堯佐方負宮掖勢欲妻以女擁至其家
束以金帶曰上意頃之宮中持酒殺來且出奩具京笑
不視力辭出守將作監丞通判荆南軍府事還直集賢
院判吏部南曹同修起居注吳充以論溫成皇后追冊
事出知高郵京疏充言是不當黜劉沆請並出京仁宗曰
京亦何罪但解其起居注旋復之試知制誥避婦父富
弼當國嫌拜龍圖閣侍制知揚州改江寧府以翰林侍
讀學士召還糾察在京刑獄爲翰林學士知開封府數
月不詣丞相府韓琦語弼以京爲傲弼使往見琦京曰

公爲宰相從官不妄造請乃爲公重非傲也出安撫陝西請城古渭通西羌唘氏畀木征官以斷夏人右臂除端明殿學士知太原神宗立復爲翰林學士改御史中丞王安石爲政京論其更張失當累數千百言安石指爲邪說請黜之帝以爲可用擢樞密副使進參知政事與安石論辨又荐劉敞蘇軾掌外制安石令保甲養馬京謂必不可行會選人鄭俠上書言時政薦京可相呂惠卿因是譖京與俠通罷知亳州未幾以資政殿學士知渭州茂州尼叛徙知成都府蕃部向丹方寇鷄棕關

聞京兵至請降議者遂欲蕩其巢窟京請禁侵掠給稼器糧食使之歸尼人喜爭出犬豕割血盟願世世爲漢藩惠卿告安石罪發其私書有曰勿令齊年知謂京與安石同年帝以安石爲欺復召京知樞密院京以疾未至帝中夕呼左右語曰時夢馮京人朝甚慰人意乃賜京詔有渴想儀型不忘夢寐之語入見首以所夢告焉頃之以觀文殿學士知河陽哲宗卽位拜保寧軍節度使知大名府又改彰德范祖禹言京初與王安石不合後爲呂惠卿所傾中立不倚之操爲先帝稱且贈陵學

士獨京一人存若付樞密必允公論時京已老乃以爲中太一宮使兼侍講改宣徽南院使拜太子少師致仕紹聖元年薨年七十四帝臨奠於第贈司徒謚文簡張舜民字芸叟先世洛陽自張諤官鄂州致仕家於江夏之湘東里徽欽南狩時祖樞密叔夜父狀元棟祖母蔡母王闔室殉節白溝河舜民年時十二亦將赴井大將張勇抱持慟哭賊哀之釋去勇乃奉舜民奔江夏之靈泉山力耕以給鋤地得金鉅萬乃聘致名儒講求性命之學立祠刻四像日夕拜酌終朝誦哭不絕聲理宗

江夏縣志

卷之十

行業

十

授太守著有南遷錄

張文淵弟文潛舜民之子皆有文行居官以循良著

明

會泰洪武初以秀才徵學行允孚上重之每慷慨論事言無不從超拜戶部尚書祀鄉賢

辜臯洪武初知饒州德興縣招撫流亡聚兵障寇時開礦權銅爲民患奏請罷之乃修學校建橋梁拓葦蕪鷄犬相聞遂爲樂土

劉仲廉洪武乙丑進士淳質有守永樂初營建北京多

効勞績陟工部侍郎郭舊志云劉尙書首應制科備位
鼎鉉功在體國望重鳩民爲吾邑士民冠冕偉矣

盧文政幼嗜學溫雅有度洪武乙卯舉於鄉授吏部主
事累官太僕丞致仕年八十手不釋卷著歷代一覽
武楫永樂甲申進士任知縣司牧有方民安如堵秩滿
百姓詣留命馳驅復任

曾敬字以恭永樂壬午舉人甲申進士任四川道監察
御史陞四川督學僉事有賢聲

鄧真字存誠永樂辛卯進士授監察御史上疏言時務
十事擢山東藩臬讞獄詳明政事通敏愛民如子卒於
官吏民或見行止如生以爲神繪像祀之

吳軌永樂癸卯鄉舉授兵部主事廉勤明敏沉機先物
守外艱用當道薦詔奪情起復改戶部遷山東按察司
僉事

黎忠字行恕正統中初任建昌推官閩寇鄧茂七攻陷
隣境忠屢出奇謀克摧賊鋒遷福建知府

王竑字公度號懋菴由江夏戍籍陝西河州正統己未
進士授戶部給事十四年英宗北狩景帝監國廷臣伏

闕劾中官王振罪錦衣指揮馬順叱衆令起竝奮臂掉
順髮嚙其肉百官爭拯順死俄遣都御史陳鎰籍振家
並其黨竝於是直聲震天下是年冬虜犯京師命竝監
守北城軍當是時北城諸將獨戰勝退虜京師解嚴竝
上言虜去不大挫必再至宜急爲戰守計尋陞竝僉都
御史督守居庸諸關訓練士卒繕塞險隘軍政一新未
幾病免景泰二年總漕淮上三年巡撫清理鹽法賑濟
劾巡河御史王珉貪淫謫珉戍開平竝開倉賑濟以狀
聞乃自劾上曰賢哉都御史活我百姓勿劾四年陞副

都御史仍治淮安英宗復辟石亨等論其擊馬順事罷
爲民編管江夏天順五年亨來寇陝西京師曹賊反大
學士李賢薦起竝視師會虜退再蒞淮上聲華愈重成
化初年遷兵部尙書時兩廣蠻大起竝薦前侍郎韓雍
有文武才宜令帥師討蠻而雍新得罪衆難之竝曰天
子方棄瑕錄瑜疑雍罪不當用乃竝不以罪廢耶議始
定卒成功又薦修撰岳正給事張寧不聽請老歸二十
載乃卒正德中賜祭葬諡莊毅郭舊志云竝生平嘗自
擬汲長孺廷擊馬順戮大憝以靖人心經畧莊浪邊鄙

不聳總司樞管克詰戎兵首薦韓岳以人事君不負所舉可謂大臣也矣

陳文偉中正統丁卯武科膺力過人常曉行遇虎以手搏之竟斃虎會試場屋火文偉左據牆右持同事生履肩而出活若干人知安邱縣有賊百餘掠庫金去文偉單騎挾彈馳追之間諸賊誰爲首者彈發中其左目再發中右目賊皆伏地請送庫金還偉以一騎尾其後賊抵縣請死偉曰吾何有於諸賊各杖三十遣之而御史竟以縱賊論免其官

王慶字仲景正統壬戌進士任戶部給事中因邊患以練達暫改御史巡按山西練兵守備事平遷左給事中歷官廣東右布政使

蔡淑正統初年歲貢由教授除任大興知縣長於吏治性戇直不畏權貴大興人德之有強項之目

劉允寬字公量景泰庚午鄉舉任嚴州通判有惠政遷霸州牧霸爲九河故地水潦頻害允寬造橋梁水患除大學士劉健有記又積粟四萬斛銀三千兩備荒三年考滿州民請留巡撫彭韶下霸州所行事令他邑爲法

歷任十二年遷慶遠同知所至皆以方正聞吏民畏懷
致仕歸有不便於民者侃侃言之當事邑故便民倉在
青山寬爲言巡撫湯公屯糧五十里外不便移置平湖
門外邑人便之又有長短馬夫寬議爲六差筭行之時
當道之峻刑者有女穿梭魚上灘等名寬皆爲書勸除
之凡可爲德於鄉里者蓋不留餘力而性極亢直嘗面
斥人過人愈敬憚焉

劉餘慶字廷吉景泰癸酉鄉試第一天順初選知縣同
選二十八人是夜上夢二十八宿見因盡授御史餘慶得

江夏縣志

卷之十

行業

十四

浙江道歷貴川副使時都勻作亂捐俸撫綏事平致仕
刑部嘗稱其斷無主之寃存有孕之婦居鄉絕跡公門
獨以清白遺子孫

辛浩字養正正統戊戌進士任監察御史彈劾不避權
貴謫戍遼陽俗不尙文學浩至乃選將校子弟教之皆
有成天順中復其官郭舊志云辛御史風力今鄉人猶
傳辛家巷

徐鏞字用和成化己丑進士授行人遷監察御史巡視
通州時濬大通河鏞獨疏不可旣而漕舟果不達巡按

福建多善政還朝以災異陳疏條議獻貢賦正課程革
奸弊均祿食四事臺長重之與同官共劾小人之附權
勢者又極論名器之溢請汰冗官會宮變請免慶成宴
謫鎮原知縣值歲饑脩預備倉掘地得古窖錢千萬周
人貧之及代流亡輸累歲逋課改臨潼令父老泣送之
宏治初遷淮安知府轉廣西參政歷河南布政督漕副
都御史

徐鉞字用寧宏治庚戌進士性孝友兄鏞邁病鉞禱於
神願以身代授浙江瑞安知縣有德政遷戶部主事再

補工部監蕪湖關稅以母老乞終養正德中起禮部員
外遷肇慶知府致仕歸

徐鈺字用厲與兄鉞同舉進士使交趾年僅弱冠交趾
設宴禮烹猩首以進鈺舉箸刺其兩眼交人悚服改南
貴州道御史告歸嘉靖初起漢中知府歷四川布政郭
舊志云徐氏兄弟三人皆以功名顯其先興國人顧三
世江夏俱由府序出身今子姓俱在墓葬洪山之陰

張璞字中美宏治乙丑進士授監察御史巡按雲南風
裁凜然行部無遠近皆單車周視時鎮守太監梁裕爲

劉瑾心腹濫取民間柴薪酒米松子各色銀凡數千石
役軍士剝害邊民璞重懲之先是鶴慶同知敖英以貪
酷將論劾裕乃與英構謀誣璞瑾因逮繫璞下錦衣獄
不爲屈刑部主事孫繼芳上疏力爭不報繼芳病免璞
竟死獄中嘉靖初追贈太僕寺少卿

會賢仲字時望天順甲申歲貢任雲南曲靖軍民府經
歷片言折獄當情協律攝官南寧土官安東安奢兄弟
仇殺賢爲區處反覆開導釋夙怨仍相歡好各餽金馬
不受宏治庚戌考職報最

江夏縣志

卷之十

行業

六

牟盛字汝登正德丁丑進士授吉水令有清白聲宸濠
之變武宗議親征調度百出公獨急保障吉水人賴以
無恐遷戶部主事歷郎中督餉易州不媚閹監亡何以
內帑盜發坐典守落職歸執父母喪盡哀廬墓當其令
吉水識羅洪先於諸生中及卒洪先爲誌其墓

羅瑛字汝延正德甲戌進士授戶部主事遷員外郎再
遷安慶知府稱清白吏所較量斗斛秤尺以銅爲範安
慶人至今守之曰羅斗羅尺云歲旱披髮步禱以身爲
犧牲旋太澍雨郡人立生祠仕終參政郭舊志云羅瑛

無里聞之譽而宦轍所至各有述焉

韓楷字以正正德辛巳進士授刑科給事遷掌禮科以議大禮廷杖幾死出爲池州知府歷江西左布政遷右副都御史巡撫雲南致歸

李珍字貢甫諸生時以學行著稱舉正德癸酉鄉試授四川大足教諭時張副使某獲玉兔屬珍作玉兔賦獻於朝後臺使者交薦珍或勸之行賄銓曹可不日就徵珍曰苟而合吾恥之後竟授樂安令革坊里耗銀諸費入覲各里方長餽贖銀六百餘金珍却不受諸方長跪

泣以例爲請迺盡以屬庫吏代諸小民逋賦與諸罪人贖贖後復調郟西紫陽縣時學宮祀典不備禮文多闕珍爲著祭祀儀注一冊給諸生演習邑故乏科第珍爲改學宮後邑中科第不乏珍雅意山水花木吟咏不喜仕進生平多著述歸田後閉戶讀書與人交寬厚稱長者

康科正德己卯鄉舉爲人骯髒不諧俗兩任知縣以忤權貴罷歸囊篋止餘俸金八錢遂憤激毀裂冠冕鄰人亦不多見其貧如此誦讀不輟督學顏公胡公造焉褻

衣出見卽謝於家不復往拜其門

翟表字玉之正德己卯舉人授松江教授遷知縣御史行步乘馬馬逸知府令表往御表搖首曰焉有爲令長而作御史廝養卒者乎卽拂袖而去改蘇州教授

趙遷字明遠宏治乙卯舉人初授南昌學諭陞江山知縣撫字得民心時逆璫擅權四方誅求無已遷竟以道不可行挂冠去

吳貞正德中貢入太學部試高等授陝西鞏昌府通判奉命市馬西戎又從征香爐山賊有功致政歸囊囊蕭

然

吳憲嘉靖初歲貢授邳州同知擢東昌府通判累署高唐州事民歌十政

吳旻字子仁嘉靖壬午舉人由博士遷華州知州歷工部員外旻勤於撫字華人德之猶傳其生擒奸黨鈎盜首金禱囚還獄矯制發倉諸異政

王守成字儒卿嘉靖庚子舉人任順德知縣忻州知州建白祿銀蠶桑包充等六事忻人稱便後遷袁州府同知致仕歸

張希范字子任嘉靖己酉舉人授四川蓬溪知縣以平白蓮賊功授五品服色

馮世雍字子和一字三石嘉靖癸未進士博學工書及詩古文辭由吏部郎中出爲杭州知府調徽州有惠政忽棄官歸時楚愍王恣睢世雍譏諍自如著有三石文集呂梁志行世祀鄉賢

詹文光字用賓與弟文慶子乾同舉於鄉嘉靖己丑進士授吳江知縣遷戶部主事歷員外郎廉州知府

呂調音字宗夔嘉靖辛卯鄉舉授汝陽知縣調青浦遷

眉州知州所至稱廉平宦歸猶如寒士當知汝陽時識巡撫趙賢於總角及撫楚數式其廬調音一無所請某王以罪廢行千金爲壽大罵揮去沒後趙爲表其墓彭冀衡字孟登嘉靖丁酉鄉舉由長葛教諭遷中牟知縣值寇攻城督民兵親與之戰殲巨魁馮錫張東山等有功遷寧州知州寧俗輕悍稍忿輒自投崖死冀衡爲約法民不敢犯尋以母老致歸

張鵬字之遠號洞南舉嘉靖丁酉鄉試授浙江金華通判其地濱海多盜鵬弭緝有方羣盜斂跡又奉上移文

犒海海人咸服歷官九載多善政嘗識經略熊廷弼於
兒童時許以國士子應箕以歲貢任廣西昭平縣令孫
枚以京貢任山西岳陽縣令

周冲字深甫嘉靖癸卯舉人由德平教諭陞江安令廉
潔有惠政會檄採買多病民冲遂上印綬辭歸署中之
物一無所取家人私一門幔冲知令還之居林下貧若
諸生年七十七卒祀鄉賢

余蔭字庇之恩貢授普安州判有土司專擅不軌頭目
張朝觀翼之蔭始至矢志振刷觀懼假饋檣榔以納賄

卻之且杖觀而清其弊當道服其廉潔列薦剡遷汝寧
同知因丁內艱未赴任遭觀反噬聞之憤鬱而卒

郭懋字子德昭信校尉郭用裔孫舉嘉靖己酉鄉試授
杞縣教諭流寇薄杞杞人爭門出邑令且棄城走懋毅
然居守民藉以安兩臺異之檄代行杞事於是下令邑
中集丁壯日張蓋鼓樂巡城宣言大軍且至賊引却事
聞遷威遠知縣遭喪起補舒城舒故無城而其民又善
訟因範土爲壇令訟者如式輸之以當金矢不半載城
成後遷趙州牧以子正域貴贈如其官

侯應爵字天錫嘉靖戊午鄉舉授乳源知縣清淨糧二百石均徭於英德持訟於曲江韶人德之攝篆新會創建海城遷廉州同知勦羅傍首功加四級超遷羅定僉事又擒搖寇飛龍虎等撫其衆數百人遷貴州參議以母老乞歸地方利病知無不言楚賦徵米以食衛軍謂之府米應爵力請於當道裁其半年七十有七卒曹當勉字可賢嘉靖戊午舉人壬戌進士授行人遷刑科給事中出知開封歷霸州兵備江西參政生平無遺行蓋純篤君子也

江夏縣志

卷之十

行業

三

詹朝字伯時嘉靖辛酉鄉舉文光季子乾之弟初任盱眙知縣清廉勤慎識馮慕岡於諸生中許以國士調儀隴採木有功遷廬州通判致仕歸杜門不出子鳴瑞肄業國學攜家而南

張誠字應元舉孝廉元末不仕僻處靈泉力學敦行樂善不倦元癸卯至乙巳輅齒野積竭力瘞之洪武壬子以康茂才薦召試白燕詩賜翰林及第

張添祐字仁一號鶴山七歲能文日誦六千文過目不忘洪武癸酉舉鄉試第一臚唱畢奏曰戴德彝天下名

士齒德俱優臣年少忝居其上願以探花讓高賢上重其德器未幾擢詹事多方輔導尋擢南京吏部尚書晉位冢宰太祖勅賜忠良正直四字褒之戊寅致仕歸冬十一月張統居是官蓋所薦也宣德二年屢詔起公爲臺諫大有建明惜不專任旬餘月去官洪熙元年再起爲相吏民抃舞相慶宣德二年以諫廢后忤旨歸壽終八十有四

張天祿由廣西布政司擢四川巡撫十有七年屢辭不可勅永鎮民甚德之

江夏縣志

卷之十

行業

三

張必貴字榮三由洪武丙子舉人出爲縣令以治行卓異遷太守尋御史舉其才除授主事永樂中擢三邊都御史以廉直著

黃彬從歐普祥歸明太祖同守袁州扼陳友諒潭岳贛兵不得出感其勢彬力也太祖以爲行省參政未幾普祥死彬領其衆普祥故殘暴彬盡反所爲民甚安之其後降熊天瑞招集諸山寨定江西進江淮行省中書所丞洪武三年封宜春侯歲祿九百石予世券賜第中都殷承敘正德九年進士授刑部主事以諫武宗南巡受

杖穆宗嗣位贈光祿少卿

陳之清字淡夫萬厯庚戌進士授晉江知縣累山西副使所至卓有政聲天啟丙寅魏璫柄政清念雙親垂白未可以身許國乃以養老乞歸

朱盛淶字蓼菴楚宗室克信之子克信有學行潢系如寒素淶有父風癸未獻逆之變盡驅楚宗入江淶與焉浮三十里至鮑家莊抵岸僧有汲者救之甦逃梁子山依戚屬居焉易名謝世仁字忍生隱於醫聲甚著工詩唱酬皆名宿與王子雲葉井叔輩合刻有郢雪編通丹

江夏縣志

卷之十

行業

三

經壽近九十子容棟字二安亦有父風以醫著某撫欲薦之太醫院力辭不就著醫宗尺玉琴操諧譜梁湖草壽亦近九十相繼峻嶒之槩懷葛之風翛然塵表

周文卿字蓋之隆慶辛未進士授韓城知縣丁艱補南海以清潔聞縣多虛糧爲害乃清沙坦以無稅之坦補無田之糧共七百餘石士民利之又小海中所在多漏源豪強利焉卿不避權勢悉清之以利農創建龍津橋以濟行李至今南海猶祝之遷戶部主事遼東管餉郎中遷陝西兵備副使致歸所著有詩經便意行世

江浦然字應吾隆慶辛未進士知吉水俗產女多溺之沛然首禁之累遷懷慶推官歷南都察院經歷執法不阿海忠介極稱之尋遷南戶部郎以蜚語中京察再遷審理遂拂衣歸其所著有歐陽一老人稿藏於家

周廷臬字子陳隆慶庚午舉人由松滋教諭陞蕪湖知縣調四川東陽清惠愛民轉雲南府通判辭不就

張維貞字兆甫號瑞明其先江西餘千人父應陽始徙江夏後應陽以吏選卒京邸維貞徒跣數千里輿櫬歸自少爲諸生與宗伯郭正域齊名相友善其所得廩餼

江夏縣志

卷之十

行業

十四

脩脯盡以給宗族之不舉火者九試省闈登萬歷庚子鄉試屢因公車授南漳教諭遷國子監國正歷南禮刑二部司務陞南刑部員外轉郎中所在冰蘖自持嘗自謂一路寒局窮而彌堅也尋出爲廣西南寧府知府軫恤災荒數多善政擢雲南按察司副使覲行時士民簞壺扳留維禎賦詩慰遣之抵京上疏乞休致仕歸兩舉鄉飲年七十五卒所著有荆玉鈔正續二集思鱸錄若干卷崇貞初年崇祀本邑鄉賢及南陵名宦墓在縣南之八分山大學士賀逢聖爲誌其墓

常居敬字惟一萬厯甲戌進士授南昌推官訊獄詳慎
遷戶科給事尋掌工科以督理漕河功遷太僕卿巡撫
浙江時倭寇披猖自募兵三千人討之而以千人助攻
寧夏糗糧自辦上嘉其忠祀鄉賢

張文光字公覲弱冠舉萬厯丙子經魁博學雄文於書
無不讀戊戌成進士選庶吉士授檢討旋以楚藩事獲
罪沈一貫謫光山縣丞久之遷尚寶寺丞每慷慨陳言
述古今法戒修身講學之要尋遷少卿乞差南巡卒於
道祀鄉賢

江夏縣志

卷之十

行業

三五

丁應泰字元父號衡岳萬厯癸未進士初授休寧知縣
慷慨任事擢刑科給事中建言忤旨謫山西照磨起登
封知縣陞兵部主事參謀朝鮮又劾石星楊鎬落職歸
隱卒朝論惜之

郭正域字美命號明龍父懋仕趙州守正域生而卓犖
籍甚膠庠性慷慨尚氣節新城王中丞之垣延爲子師
陳其書篋庭檢之正域一宿輒稱病出郡伯某徵爲古
文詞遣吏督促不應曰豈試士法耶登萬厯癸未進士
選庶常念李何諸君子逸於外妄謂登壇不由吏部

有以振之於是文必西京詩必鄴下一洗臺閣體相沿之陋而尤究心朝典自河漕監屯兵食大計四方風土人物利弊興革之宜無能傲以所不知者丁酉服闋補編修二十二年充東宮講官陞中允歷諭德庶子凡五年皆不離講幄大學士沈一貫初出山嶽嶽自負正域獨不少屈一貫志正域侍東宮久例不當出卽出亦不當南而一貫欲遠之二十六年出爲南祭酒條上監規七事請倣司馬光十科胡瑗二齋以揆真才又請罷納貢以重明經之選李都督者寧遠之孫魏國之婿也騎

而過文廟門學錄李維極執而扶之侯家奴百數蹋邸門而寧遠魏國亦盛氣愬正域正域曰以學錄扶都督誠過然公侯子入學習禮亦國子生耳安得走馬過廟門今以先師扶國子生非學錄扶都督也明日詣門交相謝而罷二十八年陞詹事府詹事儲講如故三十年晉禮部右侍郎掌翰林院印踰年回部攝事是時一貫爲首相歸德沈鯉入閣未幾有清望又素善正域一貫意思鯉益恚正域爲之助正域在部諳典故惜名器堅執持敢諫諍部務肅然孟朔日食值廟祀正域言禮諸侯

旅見天子入門不終禮者四日食其一也當祭而日食
牲未殺則廢宜以朔日專救日翼日享廟從之封益王
使者將發而王薨正域斷以聘義遭喪入境則遂也諸
侯相聘必致主命况天子之於臣耶卒遣使行夏至陪
祀諸臣託疾不至域謂祀事不虔由上久不躬祀所致
請下詔勅厲其意實以諷切人主回回人候內府玉價
羈留病死號泣道左正域曰明主可以理請奈何以小
費失外夷心疏請支給詔趣承邊庫予之日食之占曰
日從上食主君用佞臣以亡其國一貫聞而惡之召臺

臣罵曰若妄言禍福者當參正域曰宰相憂盛危明固
不若瞽史乎彼能參我能救一貫氣沮兩淮稅監魯保
請專勅關防兼督浙直織造一貫欲予之域持不可曰
督造卽礦稅之別名也保得關防是總督四省也勅可
予關防不可予一貫以上意務正域正域持益力事遂
寢嘗以諡法多濫其甚者議奪次議改而故大學士餘
姚李本在議中一貫聞之曰吾在誰敢奪正域曰敢奪
者我也若以黃光昇當諡是海瑞當殺則葛守禮諸人
皆當鑄其秩沒其卹也疏上竟留中故事藩國由中尉

進封者次子不得封郡王而秦王請次子爲世子正域
堅持不許秦王續奏曰旣不得世子請封郡王域不可
貫不能平時楚宗人華越上書告楚王華奎非恭王子
事下禮部正域請下楚撫勘一貫言親王不當劾但當
體訪時朝臣多受楚賄謂正域故王護衛中人修怨陷
王用以盡力排正域正域遂求去疏四上乃得允舟泊
楊邨而妖書之獄起妖書者卽所謂憂危宏議也不知
何人所爲一夕間宮闈都市皆遍上見之憤懣不能食
下詔大索而一貫欲借以傾正域臺臣康丕揚錢夢臯

等皆疏論妖書出正域手而大學士沈鯉同謀時正域
在楊邨重圍擊柝邏卒喧呼徹晝夜聲言欲逮正域勸
令自裁正域意豁如也提督陳汝忠盡械正域僕婢及
傭書者拷毒備至竟無所得會東廠捕得京諸生曠生
光生光嘗以宿恨造妖詩大書鄭戚之門上欲歸獄生
光一貫主詳鞠令其牽正域生光罵曰死則死耳奈何
誣郭侍郎又御史牛應元沈裕比部王述古皆力爭之
遂具讞上大獄乃解生光坐死寃亦莫定爲生光筆也
正域歸十年乃卒年五十九後四年贈禮部尙書賜祭

葬天啟初奉光宗遺詔贈太子少保蔭一子中書舍人
諡文毅所著有皇明典禮志武昌江夏府縣志十三經
補註若干卷

賀時泰字陽亨父廷秀世居里之南門泰少爲郡諸生
礪廉隅不苟嘖笑不妄交遊惟與同里郭正域大治尹
惠州相劇切力貧課子教授生徒著有思聰錄人模樣
三世事小錄及女箴二十四則學者稱爲陽亨先生當
明嘉靖乙巳歲祲及除日幾斷炊以一伏雌易米豆共
五升始具三宿飯後子逢聖旣貴泰卽書作堂聯曰當

江夏縣志

卷之十

行業

五

年雞豆未忘念此日兒孫莫妄思又爲詩云清苦丈夫
志風霜善自持陽和非不愛義命貴安之所朝夕訓逢
聖者惟餓死事小四字故逢聖自解褐登揆席恭謹清
約如一日卒以忠節顯其得力於庭訓者多矣祀鄉賢
常居安字惟靜萬厯戊子鄉舉授隆昌知縣安奢兩蠻
構釁時議勦欲奪隆昌積儲以佐軍居安力持不可曰
萬一隆昌早奈何牘抗上官者再後廷議竟與居安合
而隆果早得積儲賑濟遷延平通判署福寧篆有議量
革海艘省金錢萬餘者居安復力持之曰海寇叵測無

貪省事之名後海寇果大發人皆服其深計
安勝本江南鳳陽府定遠縣人元末擾亂勝本團結鄉
勇於至正甲午年率眾歸附和陽王隨征采石又征陳
也先屢著戰功洪武二年封武昌中護衛正千戶世職
後安長生襲千戶於洪武十五年隨楚王就藩武昌遂
居江夏襲職者俱詳武勳中今子孫蕃衍列科名登仕
版者大有其人爲江夏望族焉

段然字幻然萬曆乙未進士授南平知縣調吳縣守制
復補輝縣所至有異政遷南戶科給事中屢獻讜言會

宗室華越等許奏楚藩然上疏直華越四明沈一貫忌
之謫江西按察司知事久之遷兵部員外歷官以風節
聞朝野憚之

游士任字肩生世爲嘉魚人徙江夏萬曆庚戌進士任
長興知縣遷廣西道御史每獻替可否侃侃而談罔不
中窾當路嫉之熹廟初魏璫附客氏以蠱上心士任慨
然曰此亂本矣會差山東巡按監軍陛辭先一日疏參
客氏及魏璫自是臺省交章士任啟之也璫旣矯旨逮
殺楊漣未幾並逮士任下錦衣獄拷掠備至幸不死謫

安慶成崇貞改元乃詔釋士任還其冠服

葛大同字更生號君山少穎悟工行草中萬曆丁酉鄉試就彝陵學諭陞南雍學博晉繕部郎庫有羨金封識以備公用遷袁州知府後歸里杜門謝客以詩酒自娛絕不干與當事

佟養直奉天人寄籍江夏因家焉精韜略嫻技勇爲開原叅將曾陷重圍衝突而出後贈鎮國將軍都指揮同知

又入武勳

佟卜年字觀瀾父養直其先遼東人寄籍江夏中萬曆

江夏縣志

卷之十

行業

三

丙辰進士初授北直南皮縣知縣調繁河間尋遷四川夔州同知卜年素善經略熊廷弼當全遼多事廷弼疏薦卜年有經濟才陞山東監軍僉事卜年力辭不允因寄家於楚城單車之任後廷弼被論媚璫者竝構陷卜年致僨遼事都御史鄒元標知其冤質問時仰天嘆曰此莫須有事何由判斷耶刑曹顧大章亦力爭之不能救竟死於獄時年三十有八獄中題壁云生逢堯舜死慕夷齊首陽無愧天日鑒之又自著有幽憤先生傳父子俱崇祀鄉賢墓在楚城忠孝門外子國器

國朝初歷官福建浙江江西巡撫所至有聲致仕後寓居金陵今家焉

湯泃成化乙酉鄉舉第二後爲令著治績同鄉祭酒張輅薦其賢擢御史力謝歸里時論多之

張通字長空號東白萬曆辛未進士官黃門吏以文行著士大夫爭師事之江沛然哀輯所著曰歐陽老人集劉民悅字時可爲諸生以平播表得名年五十餘始舉萬曆戊午鄉試己未成進士授富順知縣每有讞斷不肯曲承上官指以是有中者遂歸天啟辛酉請閑地得

江夏縣志

卷之十

行業

三

教授蘇州飭廟學攷諸祭器作郡學志遷南國子先生尋遷南戶部主事筦江北倉務舊以此美差也民悅曰會計有定額奚利焉盡籍以報部是時鄭三俊爲尙書服其廉正指所坐以期之遂以郎官高等遷汝寧知府郡有持官府短長者號爲八部通家公廉其名不少貸以是不能貼席亦甫葺而歸築漢陰園開渠具舫逍遙林壑以壽終所著有杖景園集憤語作喻錄富順汝寧日歷蘇郡學誌及勸民曉俗諸書焦尾集秉燭編瑣尾集行世

曾先字覺吾恩貢除博士陞岐山知縣勤撫字課農桑
減賦耗百姓如得慈母焉所拔士有李宗稷後司李武
昌稱廉明致仕後年九十二以壽終

李應選字晉卿天啟乙丑進士令閩中民苦春稅選定
夏秋二限閩人德之遷主事督餉蘭州禦寇撫民擢靖
邊道民阻留不得行隻身赴任撫邊有功歷方伯又陞
江西巡撫未行卒於藩署清操如水家人煙火莫繼不
能扶柩歸里後十年乃歸葬

金城字天府天啟丁卯鄉魁署景陵學博除四川合州
牧稱廉能州人祠祀之過峽溺舟城本漢川羅氏子繼
於金兒時罔知及壯得聞作告祖文有不背恩義不忘
本源意後乃歸葬於羅

程鐸字仲聲其先隨州人懷宗戊辰進士授惠州推官
多所平反會九連山賊程萬等亂起諸生廖理申爲萬
所獲萬素憚服鐸乃得因理申以請單車抵賊巢諭以
大義旋卽歸命其黨鍾林秀猶負固遂率程萬等衆往
殲之九連山悉平焉

吳元伯字開吳懷宗癸酉舉人庚辰會試下第特恩入

月重試賜進士授禮部司務歷武選員外郎遷山東沂州參議途次遭甲申之變掛冠不出年五十八卒以子升東官御史

丁時魁字斗生懷宗癸酉以麟經魁楚榜中庚辰進士生平以大節自勵丁外艱三年守禮法罔踰服闋赴選除農部郎督餉江西是時歲祲魁措措經營輓運籌畫後值秣陵解體狼狽走袁山出沅陵入牂牁監國以論事過激予杖削籍遂下桂陵阻於兵定南藩羅致之欲用魁魁固辭惟求一歸省墓弗許留軍中嘗縱飲王召

江夏縣志

卷之十

行業

十四

欽巨觥立盡沉湎數月以死

馮尙字汝義號杏臺中嘉靖戊午鄉試選直隸睢寧縣知縣調河南考城縣有惠政以介直去官考民德之立生祠於學宮之側見考城名宦志

董暹字長馭萬曆甲辰進士江夏以麟經掇科者自暹始授建陽知縣入爲吏部主事會同里有忌之者改南吏部尋論歸暹怡然畧不爲意壬戌起禮部主事遷員外郎提學廣東持衡藻鑑所前茅士無不命中者陞山東濟南道遷按察使漕運都御史李若星疏薦暹材可

大用陞布政使致仕卒

朱容楯明楚藩宗室崇貞時任江南無爲州知州時饑饉之後繼以兵燹容楯修整城壕招徠百姓戴星出入疊著勤勞

張翺南以明經授沔陽州學博訓士有方擢梁山令多惠政

國朝

張廷賓字上卿一字天若明懷宗己卯鄉舉司鐸崇邑修葺學署順治乙酉餘賊殘害郡邑掠名宿陳某欲殺

江夏縣志

卷之十

行業

三

之賓爲解其圍己丑成進士任黎城知縣討平山賊親歷村鎮撫集流亡襁載而還者相屬旣王師旋經黎邑單騎伏謁請禁侵掠未幾卒於官所著長安春集存於家

陳基字受伯十歲能文督學水公以神童目之順治戊子登賢書己丑成進士授山東卽墨令訓士愛民六年報最以親老終養歸奉母終不仕當事欽其品舉鄉飲大賓寄情詩畫尤工竹蘭子奇俊逢春皆名諸生

吳琮字峻季號鵠磯御史裕中之季子也當裕中忤璫

廷杖卒琮甫八歲同諸兄輿襁歸里絕跡城市者數年
懷宗卽位褒恤死諫諸臣琮始出與童子試補邑弟子
員崇貞丙子中副車

國朝初以明經授嘉魚學博敎生徒讀書務實學作人務
實行康熙壬寅除北直任邱知縣兵燹之後大文凋謝
學宮鞠爲茂草琮謁廟慨然捐俸創修召集諸生按季
課文期年文大盛先是學宮傍有苦井其水不可飲自
琮爲令忽化爲甘泉蒞任九年日設天鑿在茲簿畫之
所爲夜卽書之歸田後當事嘗造廬相訪凡邑中有不

江夏縣志

卷之十

行業

美

便於民者必力陳其弊卒年六十四子三人莊生錕生
尊生

陳鼎字禹九先世籍秦富平隨父承業官金口巡檢獻
逆屠武昌父死於難遂家江夏順治初効用軍門東山
之變單騎入賊巢與語彌日賊遂降當事上其功授雲
南廣西府通判有惠政時滇南初平米價騰踊兵民爭
糶創爲分糶之法郡邑效之兵民以和移疾歸里癸亥
邑大饑中丞張公朝珍檄請監賑鼎慨然自任竭力輸
助年七十八卒於家

常正綱字公振號朝元開平忠武王嫡派原居河南孟縣遭八賊亂祖子厚遷鄂城父應爲荊州營驍騎尉不壽而終正綱年僅十五歲遵母張氏命勤學康熙九年隨湖廣總督蔡征雲南吳逆制府見其人不凡詢知爲開平王後卽予以參領職銜爲牛銳都督諒有材督陣攻打辰龍關一路諒爲賊暗算軍中無主正綱匿諒喪握兵符督兵仰攻辰龍關攀籐先登斷敵要害衆兵得以進勦遂成大功軍中猶以爲諒都督也凱旋議功

引見蒙

江夏縣志

卷之十

行業

三

聖祖親驗陣前所受刀鎗痕詢知以常易諒之故賜復本姓授都督僉事職銜就近借補柴溝堡守府以便隨圍嗣丁母憂回籍適值裁兵夏逆亂正綱聚家丁義民三百餘人預伏蔡家溝擒殺賊數十人賊退走挫銳起復補授湖南武岡營遊擊陞署沅州協副將兼護永州鎮印務雍正癸卯年六月奉檄辦理征阿爾特誕兵以勞卒於洞庭舟次子三人長春次景又次紹爽奉

恩旨俱著在宗人府効力年滿議敘

楊兆傑字又仁一字鄂州少卽儻多奇氣父五美以

武舉團練北山山豪張其倫掠入巢勒以良馬贖兆傑聞難亟赴之語其倫曰穉子無從得馬第令阿爺歸謀所以贖者乃留兆傑而五美得脫其倫敗兆傑沒入南陽營其弁愛之撫爲子出就府縣試遂首南陽南陽大弁聞而喜致之戲下適其伯父慕楚督兆傑潛寫赫蹏附公移督院見之驚詢得其實飛騎取還讀書攻苦每念曾祖逮其母皆懸褫署其案曰四喪未舉兆傑忍忘之乎丁酉領鄉薦一上春官不第謁選授大理推官措兵籌餉悉中機宜所平反大案數十全活人以百十計

江夏縣志

卷之十

行業

三

而悍將驕兵及同官法諍無所忌入爲兵部職方主事戊申安南王黎維禱逐都統莫元清寄滇境廷議推兆傑偕侍讀李仙根往諭賜正一品麟蟒服抵文駐臨賀館諭令迎

勅開讀而交之輔國鄭億官屬胡士楊等殊簡傲兆傑引律典切責之渡富良江維禱不出迎兆傑欲斬引禮官卒迎謁如儀然維禱具奏竟無退還尺土一民意致書詰責始獻高平四州地及四州降人黎莫禍乃豸庚戌奉命權淮關抵任才四日以父訃歸卜葬廬墓遇地方利弊民

生疾苦爲當途侃侃陳之服闋且赴補會西南變起逆謀陳鵬舉走險分布僞劄妄意兆傑官滇中因誣附其名事聞被逮屢訊無狀蒙垢隱忍鬱鬱以死旋接

溫旨滌除顧無及矣兆傑少失恃事繼母如所生異母弟三呼吸與共艱於嗣以弟兆億之子爲子其官大理時買妾何氏詢知故夫在立還之所著日南紀事雜詩文數十卷藏於家

汪鏞字鐘如未弱冠補博士弟子員隸業江漢書院受知翟方伯癸卯膺鄉薦庚戌成進士初任中書時當三藩判章奏日夜不絕八直

江夏縣志

卷之十

行業

堯

丙廷勤勞不少暇轉戶部主事典倉差糧儲皆手自清算嚴察諸弊吏役凜然嗣考選吏部歷四部者十年清流品選賢能凡黜陟大政引例據典毅然持正不阿乙卯分校順天甲子典試陝西榜發咸慶得人年六十以疾卒鏞爲諸生時家貧事母孝奔走四方竭力以奉甘旨及歷官京師母老留家室以待色養其請假省親請假終養屢邀

予告母卒哀毀幾絕性尤友愛兩世未嘗析居嗜理學以不

役苦偏累編審時逐戶研訊役遂平內艱服闋補臨清
屢折大獄無假借卒於任

陳肇昌字扶昇號省齋江夏人後移居黃岡辛卯舉於
鄉戊戌成進士授寶鷄令招徠撫字蠲除逋賦率多賢
聲陞工部主事轉員外督淮安鈔關管戶部郎中提學
粵東公明造士入爲僉都御史授順天府尹方肇昌爲
九卿凡廷議會推秋讞諸大政公卿多從其議條上輒
報可生平好讀書雖在倥傯不廢鉛槧晚尤精於易潛
心不倦子大年大章大鞏大羣大華大輦俱登科名家

江夏縣志

卷之十

行業

聖

稱孝友

張耀字蔚章本籍姑蘇以父伯達令黃陂因家江夏之
塗川耀少負奇姿爲文磊落不羣康熙己酉舉於鄉授
直隸永年令猾民佐吏爲奸一繩以法會大旱徒步以
禱甘霖立沛繪監門圖請賑獲內帑萬餘金給發無中
飽邑多響馬督健壯擒渠魁置諸辟以病卒於官

周國貺字我嘉醇茂質直讀書而外無餘事甲子舉於
鄉丁丑成進士除山西岳陽令清廉愛民年餘卒於官
貧無以殮民爭鑿錢治喪事人咸服其清白云

王綏猷字允諧號兩湖江南鳳陽籍先世從明太祖征討有功世襲圻州衛指揮崇貞中遷江夏年八十餘兄弟未嘗析產手錄忠孝節義之事數百條垂爲家訓猷生而穎異久困舉場膺壬午歲薦以子開泰封翰林院庶吉士生平正直不阿訓子弟循循有法度與人交然諾不欺遇戚里貧之周給無德色足跡不履公廷子六人長開泰次開運開藩開銓開禳開夏

王開泰字乾來號魯岑爲諸生時卽以節自厲康熙己卯舉於鄉庚辰成進士選翰林院庶吉士改授廣東博

羅令博羅舊例有大絲役火耗繁重民極困弊開泰下車痛革之日受民牒盈尺許卽日判決發奸摘伏往往出人意表絕請託鋤強梗卹孤寡課文勤學上下翕然稱之以丁外艱歸博羅民扳輿垂泣有送至千里外者服闋補浙江慶元令慶元居浙西萬山中民俗刁悍多負固先是蒞茲土者威治之卒不服開泰至一以理論悉皆歸誠向化民間有積冤十餘年不伸兩仇相構至棄邱墓田廬而竄廉得其狀平反之遂各歸故業由是四境大治視事僅八閱月櫻疾卒時論惜之

婁玠字介山號東村幼補弟子員康熙庚寅吳藩倡亂
黔戎帥趙賴素聞玠賢以禮召致之而談時事多中機
宜乙卯從趙討平江西諸賊尋趙又督都軍進師寶慶
所在克捷黔中平錄功授狄道知縣狄固土瘠民貧玠
至均徭賦嚴保甲峻緝捕暮月大治乙亥

上親征噶爾旦玠領後軍督軍寨外窮荒絕漠猶雅志文墨
所至相山川形勢爲詩繪圖以志名曰廣漠紀事治狄
十六載兩舉卓異乙酉遷京兆別駕己丑陞戶部廣西
司員外郎未任卒子三人正詔正志正輔

江夏縣志

卷之十

行業

三

陳一道號貞庵懷宗丙子舉於鄉順治初攝嘉魚縣事
丁亥成進士令孟縣勤敏清慎多善政公餘寄情詩畫
牡丹竹蘭傳世

方文瑞字河書號體菴別號龍山世居邑之永豐里績
學工文有聲庠序中康熙丁卯舉人甲戌成進士初授
河南考成縣知縣時水旱沴民多轉徙公勤勞撫字
開渠築堤民得安業以居邑爲中州小學入庠額止八
名公振興文教英才濟濟題請得比縣中學數有加焉
公以經術爲治教養有方雖平日號爲桀黠狙獪之人胥

化於善旋行取工部屯田司主事清操自勵凡饋遺一無所受乙未禮闈同考極稱得人殿試一甲一名徐陶璋文瑞所拔士也擢工科給事中抗疏論宗社國家之要尋陞禮科掌印都給事瑞至性純篤居鄉以孝友聞所得俸錢不營生產置義田數十石以贍宗黨之貧嘗以母老不能迎養輒南望嗚咽涕零聞訃日撫膺慟曰吾遠母幾年矣存不能供甘毳死不能奉含斂何以生為哀痛歸里遂遭疾以卒

胡潤字河九號京蒙由通山庠康熙丁卯舉人辛未

江夏縣志

卷之十

行業

四

進士官翰林編修己卯典試廣東所中取皆一時名宿遷國子監司業多所成就丙戌遷翰林院侍講轉左春坊左庶子時各省學使俱令九卿大臣保舉

皇上以江南人文重地特難其人潤以內閣李光地奏提督江南學政蒞任三載得士為多會句容有奸僧僥於資以占田產誣枉良士潤開重門親為鞠訊勿拒觀者令天下知金錢到此有無可用處僧受杖屈服士氣奮焉所著有懷蘇堂文集艮園詩集行世

汪紹遠字十雲先傳姓文斗之子嗣表母舅汪文極後

是爲汪年少力學有聲藝苑喜周急樂教育事歸母以孝聞戊午由歲薦授廣濟訓捐俸修學宮搜羅先賢之湮沒者請祀鄉賢事載通志癸亥轉安陸縣學諭重建啟聖宮敬一亭等處撫軍於計典特薦戊辰裁兵猖獗涇城陷棄妻子不顧懷印徒步走荊州請援

主帥

至復捧檄招撫百姓他如校刻禮樂志圖委茸江漢書院實多勞蹟陞九韶教授卒於官祀安陸名宦

崔相國字元卿號柏菴先世荆襄人因父彥倫於

國朝初年官承信尉自襄鄧間奉調至省從征西山賊卒

江夏縣志

卷之十

行業

五

於軍相國往求父屍五年不獲遂入籍江夏投効營伍康熙初年隨大將軍平定吳逆授都督僉事歷任浙江温州總兵康熙四十六年

聖駕南巡於杭城

召見細問征吳之事並問何攻辰龍關之速奏對良久

天顏大悅隨

頒賜迎恩堂匾額加陞都督同知掛印鎮守台灣任滿暫調處州總兵候陞處鎮原係温州屬營新設總鎮三營雖具而兵丁俱係各營調駁家室遠離軍心未安因指歷任

所積俸薪數千兩為之移家成業兵丁感悅卒年六十九歲

崔應階字世升號拙圃以父相國處州總兵二品廕生於康熙五十年補順天府通判歷任西路同知山西河南知府乾隆十五年

駕幸中嶽嘉其幹練擢本省驛鹽道旋陞安徽按察司壬申年隨兩江制府尹會同湖廣制府永湖北按察司明審理羅田馬朝柱逆案事竣回任丁生母聶氏憂服闋補官累任藩臬擢撫山東乾隆乙酉春

江夏縣志

卷之十

行業

異

聖駕南巡道經山左見河決之後地方寧謐民無飢色深加獎賞

欽賜績懋東邦匾額併

御制詩一首

此地向旬宜撫安遂晉遷

崔應階先任山東藩司繼因阿爾泰擢撫本省奏辦荆山橋一

帶水利工程頗見利民任事

理疆皆熟路涸淤為疏川斯識勤農要寧

嘉供帳便前人芳軌在努力繼其賢

前撫阿爾泰實心任事經畫得宜應階守

而弗失是其所長

丁亥夏調任福建巡撫戊子春陞任閩浙總督進階太

子太保又由總漕晉刑部尙書轉左都御史戊戌冬年八十

欽賜柏臺耆瑞匾額庚子春解組歸歿於途次時年八十有三其所著述有拙園詩草黔遊紀程研露樓琴譜官鏡錄行於世

葉方葱字青畦五世祖於明季由徽遷居江夏祖自巖中順治丁酉科舉人任黃岡教諭父蓄天候選同知未仕而歿母戴氏同伯母戴苦節撫教方葱成人天姿聰穎潛心好學與同邑潘國祚明經胡作舟孝廉相倡和

江夏縣志

卷之十

行業

四七

著有挹翠山房詩集幼懷大志緣一門孀苦急於祿仕由貢生任貴州威寧府通判以廉俸養親生子三一長仁候補同知一存仁官河東河道總督一體仁由舉人官四川敘州府知府雍正戊申年疾終威寧官署

葉存仁字心一號墨村貴州威寧通判方葱次子也父旣歿母崔氏爲崔總憲應階之姊見存仁慷慨有爲克承父志命其由營田例捐州同職於雍正癸丑年受知禮部侍郎王圖炳保舉河工効力由縣歷廳乾隆十年陞江南淮陽道游陞浙江安徽河南廣西藩臬屢著賢

聲二十七年擢刑部侍郎與侍郎阿永阿審理四川南
部縣案件二十八年補河南巡撫又與侍郎阿定讞本
省歸州盜案平允無負冤之人謹嚴鮮滋事之僕隨授
河東河道總督加兵部尚書銜二十九年卒於山東濟
南公署年五十五歲性友愛待同母兄長仁異母弟體
仁雍睦無間言母崔與庶母王顧而樂之居官甘淡泊
不苟取嘗却某餽贖詩曰月白風清夜半時扁舟相送
故遲遲感君情重還君贈不畏人知畏已知其自勵率
皆如此子一名道明任江西安徽同知

江夏縣志

卷之十

行業

哭

汪澐字荇州汪鏞第四子也康熙癸酉舉人甲戌進士
授翰林院庶吉士歷任編修侍讀侍講學士大理寺卿
內閣學士兼禮部侍郎提督浙江學政巡撫廣西江西
監理山東河務屢著賢聲康熙壬辰科會試同考官庚
子科浙江主考癸卯科武會試主考懋績詳載浙江省
名宦志

汪振繩字齊至紹遠之次子隨父安陸教諭任以安陸
學歲貢康熙二十七年督標裁兵譁變振繩年十六隨
父懷印赴荊州請兵救援蒙撫部院丁

秦明議敘紹遠陞任湖南九韶衛教授攜振繩赴任至湖
口抱病不起振繩哀毀盡禮倡修學宮並縣志均告成
功向例江邑撥入府學僅四名振繩見人文蔚起邀紳
士公呈請撥七名以彰文化學道潘深加獎賞著爲定
例雍正年間有保舉例江西巡撫汪澹欲引荐之振繩
念母年高力辭不就讓與胞兄振展出繼傅姓任荊州
府訓者澹遂改荐振展歷官山東兗州運河同知振繩
得以盡心事母振展任同知二十八載子女九人婚嫁
一切皆振繩獨力辦理不以家事擾兄心年八十有二

卒子十人本己卯舉人任棗陽學教諭彬歲貢任應城
學訓導桂林邑庠生東棗郡庠生

汪源字泉達號潤川自徽遷楚卜於江夏平湖門之內
居焉源始業儒因母老弟幼遂幡然改曰學者當以治
生爲急何必摘句尋章於是貿易江漢逐什一之利暇
則讀書與賢士遊事母楊氏以孝撫幼弟漢以友始娶
於劉生子二長知本次知楷延師課讀致敬盡禮時武
昌司馬胡與其家所延師呂稱至契屢過書齋見源之
孝友親師決其後之必昌未幾本楷次第入庠食餼每

逢歲科試兩人迭相冠軍不爽毫釐丁卯科本以五經中式改就黃岡縣教諭楷中辛酉科副車不數年而卒士林惜之繼娶於趙亦生子二知桂食餼縣庠知松食餼府庠遇歲科試二人亦屢冠軍如操券然桂於乙酉科優選拔貢候補教諭松中己卯科經魁癸未成進士授吏部孝功司主事四人文名重一時且源教漢弟子知材入縣庠孫輩皆成立次孫文炯入府庠孫壻陶應遇成辛巳進士其餘蜚聲藝林輝煌騰達者甚夥皆不問而知其必出汪先生門下也積厚流長詩書衍緒故

江夏縣志

卷之十

行業

五

人謂源之修德獲福世罕有其媿者壽八十而終其小門生魏大本挽聯云一腔惻隱惟存厚萬事寬和慣喫虧蓋實錄也

張鴻文字際飛號雪田郡庠生炯北之子中乾隆辛酉科舉人敦孝友工詩文持身嚴正接物謙和郡守保知其賢延入勺庭書院主講席數載成就甚衆及門有貧難者輒以所得館穀資助膏火自處淡泊晏如也子培原培本均入膠庠文行爲士林之望長孫奎臨由丙午優貢司鐸廣濟荊州等處持身接物有祖父風次孫宗

詠早卒婦周氏時年十八生子家駒甫一齡奎臨與弟
太學生壁臨咸篤友愛不析箸不私財視孤姪如已出
孀婦柏舟自矢撫子成立登見生孫堅操三十載待請
旌表曾孫家慶係壁臨長子弱冠入庠其餘曾元蕃衍勤讀
克繼書香足徵鴻文好學篤行之報

王開銓字衡季號山公康熙壬午入郡庠是秋卽同仲
兄開運舉於鄉雍正甲辰謁選授平彝縣多善政尋調
新平先是土苗有疑獄官累其妻子銓至出而厚撫之
苗竄菁谷中聞之感泣然保聚勢蠢動銓單騎往諭之
車輒內遷行人司乾隆元年頒

江夏縣志

卷之十

行業

五

恩詔雲南覆

命使典籍查海運倉監督兼禮部祠祭司主事廉直有聲劉
大學士奏薦考選科道入覲甫記名以疾終

王一寧字元士才豐學瞻篤志力行究心圖書之旨洞
澈精深以歲薦司訓導蘄州集諸生講求性命諄諄寔
踐勺庭書院命遵朱如鹿洞約刊朱子性理吟四十九
章令學者日三復之其出之詩古文詞者皆儒先粹語

多不經人道著有邑志畧太一山房集行世
段而聘字儒珍號竹塢江夏附貢生衡山縣訓導段燦
之子也攻舉子業甚精善書法九蹟棘闈未獲一售律
已方正接人溫恭孝事繼母夏氏夏少和順稍不如意
卽挺擊金甌諸物皆碎聘偕妻高氏兢惕奉之平其怒
且得其歡心夏攜前夫子二毛奇齡奇佐齡死具衣棺
葬之如親兄弟佐膺癘疾不能屈伸難與爲婚買馬氏
女配之給以田宅夏氏卒爲孝義所感庭幃之間俯仰
多豫色焉有嫂袁氏二十而寡無子女聘偕婦高敬事

之食必視寒煖見必以衣冠奉之同爨數十年如一日
乾隆二年爲之請 旌建坊故閭里不多袁氏之節
而多聘夫婦之能成其節也聘授徒四十餘年多所成
就及門房縣教諭朱之禮頌以詩曰白雪門環程弟子
碧紗厨侍馬先生其悅服類如此著有竹塢偶錄殖學
堂便筆詩草子一追文號笨翁優增生亦有髭末草碎
玉吟等集行世孫四長先達早逝次先達訓導壬子科
舉人次先邁太學生次先述邑庠生其曾孫輩皆能讀
書似續方興未艾咸以爲孝友之報云

劉安諱字恭已號惺菴篤學力行跬步不失矩矱端嚴
自潔纖芥不可汚里人胡太史潤視學江南聘之往小
齟齬卽拂衣去贖百金不受守身之介類如此鉛槧至
老披誦不絕澄心性命之學蓬蓽藜藿愴然也終明經
著有易經辨義澹定居草從孫成善世其家學砥礪寔
行父病_言糞以孝友著聲噪庠序屢薦不售終於諸生
著有四書講義史評虹聲集

李之蘭字文莊有異才尤篤學人稱腹笥時義奇晷蒸
織香成七構詩古文辭翰動若飛較轆凡庸雍正庚戌

江夏縣志

卷之

行業

五

成進士除華陰縣潼商道命修華山志亟稱之曰盡八
百里華山情形不啻坐臥其間也居官廉介絕媿媿甚
多惠政卒於官宦橐蕭然著述等身不能錄梓惜無傳
也

葉啟豐字履廷父宏韜江夏縣選拔官內閣典籍啟豐
隨父京邸由大興籍庠生中乾隆甲子科順天鄉試舉
人戊辰成進士授刑部主事歷職員外郎中辦理刑名
輕重悉就妥協後晉御史署給事直言敢諫風節凜然
周天祐康熙戊子科舉人壬辰成_{進士}授翰林院編修

改官知府有惠政子宏詞邑庠生胞弟楠武進士見武
勳姪宏謨邑名諸生姪孫起漢縣庠生父子皆以善書
名

徐士俊字升三康熙辛卯科舉人辛丑成進士累官至
福建建寧府知府子兆騏以五經領乾隆甲子鄉試官
雲南霑益州知州兆驥邑庠生兆駒太學生孫鴻玠官
貴州天柱縣知縣曾孫廷紀輩皆府庠

王璵字魯玉以名諸生中雍正癸卯舉人甲辰成進士
官山東安邱縣知縣負性剛直不肯諂事上官蒞任數

江夏縣志

卷之

行業

五

月卽挂冠歸子五人孫昂邑庠生

劉宗賢字次頤雍正丙午舉人庚戌進士歷官四川榮
縣國子監博士弟崇文由明經官靖州學正子之照府
貢生姪之煦領乾隆己亥科鄉薦之煇縣庠生是科同
榜進士五人吳率祖官四川南江縣知縣劉國泰官雲
南趙州知州李之蘭官山西華陰縣知縣陳道官荊州
府學教授

陳正勳字書竹乾隆丙辰舉人丁巳進士累官四川重
慶理民府奉委西藏發餉三年番人悅服子受均邑廩

生受培廩貢生任蘄水縣學訓導受奎雲南藩經胞弟
正烈字執無癸酉選拔旋中式舉人官知縣候補同知
子受琛官山東禹城縣知縣受城附貢生姪受堡壬子
科武舉受封邑庠生

王道暉字星南乾隆辛酉舉人壬戌會魁累官河南項
城南陽知縣迭著賢聲三次分校鄉闈所得皆知名士
兄道明府庠生弟道昭縣廩生子元彪姪元凱俱列縣
庠

周觀海字鈍夫家世守分讀書人庠食餼者歷十七代

江夏縣志

卷之十

行業

五

不絕至觀海由府拔貢中乾隆辛酉副車旋領丁卯科
鄉薦年高德邵學優爲士林所推服子梁以五經中辛
酉科舉人姪荆縣庠生

吳培朱字崧丹乾隆辛酉舉人戊辰進士任四川彭水
縣知縣前明忠臣吳裕中之嫡裔父溥有傳子拔元府
庠生姪報元國元調元俱庠生

歐陽照字獻年號臨川乾隆庚午舉人辛未進士任雲
南趙州知州時值軍興旁午能獲湖南謠詞要犯正擬
陞遷忽遭疾卒未竟其用士論惜之子暨頌丙午鄉薦

孫震縣庠生

陶思堯原籍黃岡因隨父幕省城遂遷江夏磊落有大志未就修族譜以睦黃岡本支立退思堂購古籍展玩其中以修己身式後來延師教子不遺餘力長應運次應達候選職員三應遠邑廩生應遇其季子也由廩庠中庚辰科舉人辛巳成進士累官河南新鄭太康縣以最陞同知居官每切風木之痛友愛三兄無間言後三兄繼沒猶撫教諸姪不啻所生

王汝泰字來莊乾隆乙酉科舉人戊戌成進士官翰林

江夏縣志

卷之十

行業

五

院庶吉士以弱體勤學遭疾卒子三人俱業儒可卜遠到

魏大年字鶴村縣廩生中乾隆己卯科舉人天性純篤幼與兄大本出就外傅卽內慧而外撲稍長潛心力學師所指畫輒解悟工書法年十九補弟子員越明年設館於家以舌耕養父母後從遊者衆愈指授殷勤多所成就父偶目恙大年吮其蒙翳目復明與人交循謹和平鄉黨從無有與之相忤者兄大本以乙酉舉人官甘肅大年任應城學諭山林愛而敬之後俸滿歸家以暑

疾歿人皆痛悼焉

明東暘字如珏爲人誠篤教子義方性愛讀書不汲汲於名遇戚黨有急不惜多金周卹之畧無德色人謂其後必昌輒應曰爲人當如是非以徼福也子二長懋紹由邑庠貢成均次德紹乾隆辛卯舉於鄉辛丑成進士任安徽蒙城縣知縣孫枝蕃術章達善皆未及弱冠次第入庠方與未艾足徵食報不爽云

袁冠鼎雍正乙卯科拔貢讀書敦品望重士林子璋歲貢生任蘄水縣學司訓教授生徒多所成就兩代著述

江夏縣志

卷之十

行業

五七

皆藏於家孫尚質乾隆甲午科經魁候選知縣

葉芝茂字恒九號紫圃家世業儒其先由江南宦楚僑寄省城遂占籍焉芝茂初積學以家貧親老乃治生敦厚信實有長者風父萬春性嚴正慷慨好施芝茂先意承志無不竭力人多感萬春之德並稱芝茂之孝娶王氏生子二長永隆易名承澍甫五歲聞人誦讀輒能竊記萬春頗鍾愛命芝茂延郡庠生張培原課讀年十二謁撫憲莊嘉其儻不羣甚異之弱冠蜚聲邑庠食廩餼中乾隆丙午科舉人候選知縣次子永年暨諸孫俱

勤讀相繼蔚起

岳重霄字會雲庠名凌霄由明生員承奉岳武穆王祠祀性至孝幼遭明寇禍母被兵刃其頸而未絕霄願身代寇義釋之母程氏旌表節烈事載黃梅縣志明舊立武穆祠基祀產於省城題龔祀生明季兵燹祠爲僧踞改一指庵祀產失業霄痛祖祀湮沒於康熙十一年呈請院司府縣將祠基祀產逐一清復崇祀鄂渚至今不絕其尊祖敬宗之意又彰彰矣

楊祖齡號敬菴鄉貢生同胞者三祖齡其季也性愛詩

江夏縣志

卷之十

行業

五八

書尤敦孝友事繼母徐三十餘年徐無出凡事曲體其志裁兵亂舉家避於夾山鄉賊平而歸復罹回祿家計蕭條後以貿易日見豐盈兩兄相繼亡撫諸姪如己子後諸姪成人俱爲婚配且讓以居室助以資本每逢祭掃必率子姪哭奠又立宗祠其敦本睦族也如此他如里黨間莫不待以忠厚一時賴以舉火者難枚舉生子二孫五曾孫九以子貴誥封朝議大夫年八十有九卒著有適閒草行世

曹如鳳字子儀廩貢生肄業成均考授州同知性至孝

父早謝世事母維謹承歡數十年如一日飲食衣服必親自檢點而後進母偶微恙卽衣不解帶母年九十猶朝夕不離如嬰孩淡於仕進潛心理學著有曹劉合稿醒世集行世壽終九十餘歲子一文棻贈武德騎尉孫三長鼎癸酉武舉湖南千總次彛邑庠生次兆熊庚辰武舉湖南守備曾元盈室人咸以爲盛德之報焉

安鼎高字應昇一字維遠天惟孝友人無間言少負異才不樂仕進家素豐慷慨好施與處世謙和無疾言遽色其兄早逝撫姪如己子婚葬大事以及運籌生業無

不毅然任之年逾七十健壯如少年猶日督家僮摒擋內外事忽一日靜坐若有所兆者命進湯沐浴談笑而逝室中微聞有異香云子三長潮次汎次法潮法俱入太學汎任丞令游至郡守清勤勵政所至有聲皆庭訓之力也孫枝蕃衍隸仕版者有人列膠庠者有人爲江邑望族以子汎貴 誥封朝議大夫

龍鎬字卜西邑庠彛龍登嵩之子也幼聰穎過人隨父讀書於外祖胡河九督學任內能文章歸補弟子員屢試冠軍癸酉選拔 朝考第一任孝感縣學教諭外艱

服闋補羅田學博後陞德安府學教授爲人方正不阿
倡修學宮任勞任怨造士有方人皆尊爲模範正膺保
薦忽以疾卒士論惜之子一名佐澂克紹書香

程士暘字東山程輝唐長子也負性慷慨於物不少屈
重然諾嚴取與折節讀書授徒里中已復棄去往來湖
湘間胞弟士曜士昫士照堂弟士曙俱早逝暘督家政
子姪肅然凡有爭不能決者暘一言釋之義之所在趨
之若渴五十七歲卒卒之前一歲謂子聯槐曰明年某
月日我必死汝識之勿忘及期拜先壟集親友沐浴而
坐曰我生平居心正直陰且召我爲縣神今將逝矣語
畢而歿聚觀者歎未曾有也